

## UCAPAN PERDANA MENTERI DI MAJLIS PENGUMUMAN HADIAH SASTRA 1972 DI SRI TAMAN, KUALA LUMPUR PADA 11HB APRIL, 1973

Y.B. Datuk Hussein Onn<sup>1</sup>, Y.B. Tan Sri Ghazali Shafie<sup>2</sup>, Y.B. Datuk Haji Hamzah<sup>3</sup>, Saudara-saudara Pemenang Hadiah Sastra Saudara-saudara sekalian,

Saya sungguh bersyukur kerana kita dapat berhimpun di sini malam ini dalam suasana ramah mesra sebagai memberi penghormatan kepada tokoh-tokoh penulis/penyajak/dramatis yang telah berjasa dalam sumbangan mereka kepada perkembangan sastra nasional.

Begitu juga saya sekali lagi mengalu-alukan tetamu dari luar negeri yang datang mengikuti Seminar Sastra Nusantara anjuran Dewan Bahasa dan Pustaka dan Gapena yang bermula pagi ini.

Dalam hubungan ini sukalah saya menyatakan setinggi-tinggi penghargaan kepada Dewan Bahasa dan Pustaka yang telah bertugas sebagai Sekretariat Hadiah Sastra bagi tahun kedua di samping usahanya yang tidak putus-putus memupuk perkembangan sastra nasional kita.

Kepada Tuan Haji Sujak<sup>4</sup> serta pegawai-pegawai dan kakitangan DBP saya bagi pihak Kerajaan dan rakyat mengucapkan tahniah dan terima kasih. Nampaknya tugas yang berat itu kenalah dipikul oleh DBP sehingga terbentuknya Akedemi Sastra yang dicita-cita itu.

Saudara-saudara sekalian,

Seperti yang kita sama-sama maklum Hadiah Sastra ini adalah salah satu langkah yang difikirkan mustahak sebagai incentive atau daya galakan. Patutlah kita faham iaitu tingkat kemajuan sastra nasional hari ini masih dalam proses peralihan mencari arah dan

---

1 Y.B. Menteri Pelajaran.

2 Y.B. Menteri Penerangan dan Tugas-tugas Khas.

3 Y.B. Menteri Kebudayaan, Belia dan Sukan.

4 Ketua Pengarah Dewan Bahasa dan Pustaka.

haluan kerana seperti saya katakan pagi tadi scope dan lingkungannya belumlah meliputi seluruh masyarakat Malaysia tetapi tertumpu pada masyarakat Melayu. Hanya apabila sastra nasional benar-benar mencapai tingkat kemajuan yang tinggi barulah dapat diberikan penghargaan yang sebenar.

Sebentar tadi, Pengerusi Penal Sastra<sup>5</sup> telahpun memberikan pandangan dan penjelasan mengenai karya sastra dalam setahun yang lalu ini. Saya sungguh memandang berat meskipun dalam kebanjiran sajak dan cerpen, ternyata pula kemarau dalam mutu karya-karya tersebut. Kita sama-sama berharap dalam tahun 1973 ini di samping melihat bertambah ramai para penulis yang menciburkan diri di lapangan sastra, akan bertambah tinggi pula mutu penulisan yang dihasilkan itu.

Saudara-saudara sekalian,

Meskipun keputusan Hadiah Sastra tahun 1972 menunjukkan hasil yang jauh kurangnya dari tahun 1971 tetapi ini tidaklah sayugia melemahkan hati para penulis kita. Bahkan sepatutnya mereka menganggap ini sebagai satu cabaran!

Saya sangat berpuas hati dengan Penal Hadiah Sastra yang telah menjalankan tugas dan kewajipan mereka dengan penuh keahlian serta rasa tanggungjawab dan saksama. Melihat pada perkembangan yang begitu pesat dalam bidang penulisan, saya telah melantik beberapa orang tokoh sebagai tambahan kepada anggota Penal yang berkhidmat tahun lalu. Saya suka menyatakan kepercayaan yang penuh kepada ahli-ahli penal dan setinggi-tinggi penghargaan kepada khidmat bakti yang telah mereka berikan selama dua tahun berturut-turut.

Penghargaan yang istimewa patut diberikan kepada dua orang anggota penal bukan Melayu iaitu Professor Lloyd Fernando<sup>6</sup> dan Encik Khoo Kay Kim<sup>7</sup> yang telah memberikan sumbangan besar dalam melaksanakan tanggungjawab Penal Sastra 1972.

Saudara-saudara sekalian,

Semasa berucap pada saudara-saudara tahun lepas, saya telah juga membayangkan harapan semuga akan muncul di negara kita

---

<sup>5</sup> Y.B. Tan Sri Mohd. Ghazali Shafie.

<sup>6</sup> Ketua Jabatan Ingeris, Universiti Malaya.

<sup>7</sup> Pensyarah Fakulti Sejarah, Universiti Malaya.

satu golongan penulis yang boleh bergantung hidup pada hasil karya mereka dan tidak mensifatkan menulis sebagai kegiatan sampingan. Barangkali masa itu masih agak jauh di hadapan namun saya benar-benar berharap semoga golongan penulis akan terus berusaha memperbaiki karya mereka bukan semata-mata untuk mengharap hadiah Sastra tahunan akan tetapi sebagai sumbangan kepada perbendaharaan negara kita yang bakal diwariskan kepada jenerasi-jenerasi akan datang.

Akhirnya, saya suka mengucapkan tahniah kepada mereka yang berjaya memenangi hadiah sastra tahun 1972 dan berharap mereka akan terus bergiat menulis.